

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: E Piti Toata i te Matahiti.

Nu. 5

Me 1935

Mat. 29

*O te paeiti mau e te ino ore i mua i te aro o te Atua, o to
tatou Metua ra, o teie ia, O te hamani maitai i te otare e te
mau vahine ivi i to ratou ati, e te tia i maitai ia'na iho, eiaha
ia viivii i teie nei ao. Iakobo 1:27.*

E Feia Mo'a.

Te parauhia nei tatou e, e Feia Mo'a i te Mau Mahana Ho-
pea Nei.

Uiraa: *O vai te Feia Mo'a?*

Pahonoraa: O tei haamo'ahia i roto i te Mesia ra ia Iesu,
i haapaohia ei Feia Mo'a. *1 Korinetia 1:2.*

Area te feia mo'a i te fenua nei, o te feia maitatai ratou o
ta'u e poupou nei. *Salamo 16:3.*

Ua haapaohia ratou, (*te feia mo'a,*) ei maramarama no
te ao nei, e ei faaora i te taata. *B. F. 103:9; B. F. S. 100:2.*

Uirraa: *E nafea tatou e riro ai ei Feia Mo'a ?*

Pahonoraa: Na roto ia i te haapaoraa i te mau faaueraa a te Fatu ra. Ua tonono mai te Metua i ta'na ra Tamaiti ia Iesu Mesia, e ua riro Iesu ei Aratai mau e ei hoho'a mau no te feia mo'a e pee atu ia'na ra. *E tamaiti noa'tu hoi oia, i ite oia i te auraro i to'na ra mau pohe. E no te mea ua haamo'a roa-hia oia, riro atura oia ei tumu no te ora mure ore no te feia atoa e faaroo ia'na ra.* Hebera 5:8-9.

Uiraa: *Eaha te tahi mau tapao e ite ai tatou i te Feia Mo'a mau ra ?*

Pahonoraa:

1.] E feia haapao maitai te Feia Mo'a mau ra.

Ia hinaaro mai outou ia'u ra, a haapao i ta'u ra mau faaueraa. B. F. 124. 87; B. F. S. 107. 27.

2.] E hinaaro mau to te feia mo'a i te Atua ra.

E ua faaue atu oia ia raua, (te tane e te vahine,) ia aroha e ia ati atu raua ia'na, i te Atua ra, e te Atua mau, e ia haamori raua ia'na, e ia'na ana'e. B. F. 20. 19; B. F. S. 17. 4.

Ia ite i te aroha o te Mesia, o te ore roa e taea i te ite ra, ia faa'ihia outou e ia tae i te i atoa a te Atua ra. Ephesia 3.19.

3.] E aroha mau to te feia mo'a mau ra, i to ratou mau taata tupu.

E aroha'tu oe i to taata tupu, mai to aroha ia oe iho na. Ioane 12. 31.

E te aroha, e te hinaaro, mai te mata ho'e i te titauraa i te hanahana o te Atua, na te reira e haamaitai ia'na, no te reira ohipa. B. F. 4. 5.

4.] E feia itoitoe te feia mo'a mau, e te faaroo hoi, e te taiata ore, e te ite, e te hitahita ore, e te faaoromai, e te aroha taeae, e te huru Atua, e te aroha, e te faahaehaa e te rohirohi ore.

*Te faaroo nei matou e, eiaha e eiâ, eiaha e haavare, eiaha hoi e taiata, ei auu marû râ, e te viivii ore, e te hamani-maitai raa'tu i te taata atoa. E ia na ô tatou i te faaiteraa'tu, te pee nei tatou i te a'oraa a Paulo; Te faaroo nei matou, e te tiai nei hoi i te mau mea atoa nei. * E mai te mea te vai atu-ra te hoê mau mea tia ra, e te mau mea viivii ore ra, e te mau mea poupouhia ra, e te mau mea roo maitatai ra, e imi maite â ia matou ia noaa ia matou te reira. Hiroa Faaroo 13.*

5.] E feia itoitou roa ratou i te porohaereraa i te Evanelia.

Te na ô maira te Fatu, *Te hinaaro na oe ia'u, — A faaa-mu i ta'u mau mamoe.*

Te faaite maira te Fatu i te huru mau o te feia mo'a mau, oia hoi, *A haere mai outou, e te feia i faaorahia e tau Metua, e parahi i te basileia i haapaohia no outou mai te haamataraa mai o te fenua nei ra; i poia na hoi au, e ua horoa mai outou i te maa na'u; i poiha na vau e ua faainu mai outou ia'u; e taata ê vau e ua ite mai outou ia'u; i vevê na vau, e ua fau-ahu mai outou ia'u; i pohe na vau i te ma'i, e ua atuutu mai outou ia'u; i roto vau i te tapearaa, e ua haere mai outou ia'u ra. — Oia mau ta'u e parau atu ia outou nei, O outou i na reira i te hoê taeae iti haihai roa i roto i tau mau taeae nei, ua na reira mai ia outou ia'u. Mataio 25. 40-45.*

6.] E tapao teie e ite ai tatou i te feie mo'a mau ra.

Oia hoi, e mea auraro maitai ratou i te mau feia o tei maitihia ei faatere i te Hau. Te feia mo'a mau ra, e feia haapao maitai ratou i te mau ture o to ratou ra fenua ai'a.

Te faaroo nei matou e, e mea haapaohia, e te Atua, te mau faatereraa Hau ei maitai no te taata, e e riro ratou i te titauhia mai no ta ratou ra mau ohipa no te reira, i te hamaniraa i te ture e te faatereraa i te reira, ei maitai e ia vai hau te taata. B. F. 134:1; B. F. S. 112:1.

7.] E mea itoitou te feia mo'a mau ra.

E mea itoitou te feia mo'a mau ra i te haaputuputu pinepi-

HISTORIAN'S OFFICE

Church of Jesus Christ of Latter-day Saints

47 East South Temple St.

ne raa ia haamori i te Atua mana-hope, mai te au i te faaueraa a te Fatu. E mea tia ia tairuru pinepine te Ekalesia mai te amu i te Pane e te inu i te Uaina ei haamana'oraa i te Fatu ia Iesu. B. F. 10:75; B. F. S. 17:22.

A tamau â tatou i te faaroo mau, a faaitoito â tatou i te haapaoraa i te mau faaueraa a te Fatu ia au roa ia tatou te I'oa e Feia Mo'a I Te Mau Mahana Hopea Nei.

Papaih'a e Anederea Sedamana,

Te Sabati O Te Evanelia Nei.

Ua uihia maira matou, to te Ekalesia a Iesu Mesia i te Feia Mo'a i te Mau Mahana Hopea Nei, i te mea i haapao ai matou i te mahana matamua o te hepetoma ei Sabati ?

Teie te pahonoraa:

No te hoê ia faaueraa ta te Fatu i horoa mai i ta'na Peropheta ra ia Iosepha Semita i nia i te hoê mahana Sabati, oia hoi, i te 7 no Atete 1831, i haapao ai matou i te mahana Sabati nei ei Sabati mau na te Fatu ra.

Te na ô maira te reira parau heheu a te Fatu ra, " E ia tia i maitai ia oe iho, eiaha ia viivii i to te ao nei, e haere oe i te fare pureraa i to'u ra mahana mo'a, a pûpû atu ai i ta oe ra tusia; oia mau hoi, o te mahana teie i faataahia ia faaea oe i ta oe ra mau ohipa. E ia haamori atu oe i tei Teitei ra, ia afai-atoa-hia râ ta oe ra mau opuaraa mai te parau tia i te mau mahana'toa e i te mau taime atoa. A haamana'o râ oe e i teie nei mahana, te mahana a te Fatu, e pûpû ai oe i ta oe ra mau tusia e ta oe ra mau oro'a ia'na, mai te fa'i i ta oe ra mau hara i to oe mau taeae, i mua i te aro o te Fatu. B. F. 59. 9-12; B. F. S. 59. 2.

No teie nei faaueraa papu roa, ta te Atua ora i heheu mai, i haapao ai matou i te mahana Sabati nei, no reira aita roa'tu to matou e tapitapiraa i te reira vahi a marô noa'tu ai to te mau haapaoraa taata i teie nei parau.

Te na ô maira te hoê mau taata e, eita e tia ia ratou ia farii i te reira Heheuraa apî, no te mea o te Bibilia ana'e maori ta ratou e tiaturi nei.

Pahonoraa:

Te tiaturi nei matou i te Bibilia e te Heheuraa apî atoa hoi, o te mea ia te reira i papu roa'i to matou faaroo nei, no te mea e Atua ora te Atua, e e haamaramarama mai oia, mai te parau hua mai i ta'na ra mau Peropheta, i te mau vahi poiri, o ta'na ravea maori te reira. Amosa 3.7: Ephesia 4 11-13.

I roto i teie heheuraa i nia nei, ua haapao-hua-hia te mahana matamua o te hepetoma ei Sabati mau, ei mono i te Sabati mahana hitu o te faufaa tahito, e ua au hoi te reira faaueraa i ta te faufaa apî. Ua haapaohia o Iesu ei upoo i nia i te mau mea atoa i te Ekalesia nei. Ephesia 1.22. E o te fatu atoa hoi oia no te Sabati. Mareko 2.27. No reira e imi tatou i ta'na ohipa e ta'na haapiiraa no'na mahana e piti; te mahana *Hitu* e te mahana *Matamua*.

E aha ta Iesu i rave i te Sabati mahana *hitu* ?

Pahonoraa:

Ua faahapa oia i te reira mahana. "Ua rahi roa maira to te Ati Iuda titau ia'na e taparahi, oia i faahapa i te Sabati." Ioane 8.18.

No te mea ua faahapa o Iesu i te Sabati tahito, aita anei Oia i faaite mai, i muri iho, i te tahi atu â mahana ?

Ua na reira mai oia. Te tatara maira Paulo i te parau no na mahana e piti i te na ôraa mai e, "Te na ô maira hoi

Mose i te hoê vahi i te parau no te mahana *Hitu*, e faaea i hora te Atua, i te mahana *Hitu*, i ta'na atoa ra mau ohipa." *Hebera 4:4*. No te faaroo ore râ o Iseraela tahito, aore ratou i ô i taua faaeearaa ra. " Ahiri hoi Iosua (*Iesu*) i horoa i te faaeearaa no ratou, e ore hoi te Atua e na muri i te faaite mai i te tahi â mahana." *Hebera 4.8*.

Ua faaite mai ra Iesu i te tahi â mahana, no te mea, mai te Atua i faaea i ta'na ohipa i te hoê mahana, ua na reira atoa o Iesu i te tahi â mahana, oia hoi, te mahana *Matamua* o te hepetoma. I te reira mahana hoi i upootia'i Oia i nia i te pohe e ua ô atu i to'na ra faaeearaa. " E teie nei, te vaira maori te faaeearaa no te taata no te Atua." *Hebera 4.9*.

E tuatihia teie nei parau.

Te Peropheta ra o EZIERA.

Ua hamatahia te parau tuatapapa o te taata nei, e te parau a te Atua, oia hoi, te *Bibilia* i te tau no Adamu, e ua papai te mau Peropheta i te mau ohipa e te mau parau tei tupu i roto i to ratou ihora tau, e tae roa mai i te tau no te Mesia ra.

Ua ite hoi tatou e, aita roa i amuihia te mau buka no te *Bibilia* i taua tau ra, e mea taa-ê-ra te mau buka: e no te varavara e te itiraa hoi o te reira mau buka, ua tupu te aroha o *EZIERA* i te parau a te Atua, e na roto i ta'na ohipa e ta'na imiraa, na haaputuputu mai oia i te reira mau buka i roto i te buka hoê ia ore te reira ia haamoehia e te taata nei.

Ahiri aita oia i na reira, e mea papu aita ta tatou e *Bibilia* no te tai'oraa i te parau a te Atua, i teie nei â mahana.

Hou te ho'iraa o te Ati Iuda i to ratou fenua tumu, oia hoi i Ierusalema, i muri iho i to ratou tîtiraa i raro a'e i to Babulonia, ua haamata te Ati Iuda i te faaipoipo atu i te tahi mau vahine êê; aita ra te Atua i mauruuru ia ratou, no te mea e, e feia mo'a ratou no'na iho.

I muri iho i te faaotiraahia o te *Bibilia*, ua ite o Ezera i te mau mea tei tupu i rotopu i to'na mau taata e no to'na aroha ia ratou haamata'tura oia i te porohaere i te Evanelia i rotopu ia ratou e i te parau atu ia ratou, *A faarue outou i ta outou mau vahine eê*, mai tei papaihia i roto i te Ezera 20.3. E teie nei, e faaau na tatou i te parau i to tatou Atua, e tuu ê atu i tana mau vahine nei e ta ratou mau tamarii, ta oe ta ta'u Fatu i parau na, e ta te feia atoa e rurutaina i te parau a te Atua; e haapao â i te ture a na reira ai.

I reira ua putuputu mai te mau taata i te vahi hoê e ua fa'i ratou i ta ratou hara, e na roto i to ratou fariiraa i te parau o Ezera, ua tapea noa te Atua, ia ratou, na'na iho, mai te reira taima e tae noa mai i te tau no te Mesia, e i reira ua haamata ratou i te porohaere i te Evanelia i rotopu i te mau nunaa Etene.

Te reira te na tumu i parauhia'i o Ezera te *Faaora* no te *Bibilia* e te Ati Iuda hoi.

Papaihia e Rui.

E faaroo mai i to metua tane i fanau ai oe ra, eiaha e vahava i to metua vahine, ia ruhiruhia ra. Maseli 23:22.

E te mau tamarii ra, e faaroo i to outou mau metua i te mau mea atoa nei, e mea mauruuru hoi te reira i te Fatu nei. Kolosa 3:20.

Eaha na Ohipa e Pae tei tupu I roto i te Matahiti 1835.

Ehoma, a feruri rii tatou i nia i te tahi na ohipa rahi tei ravehia i roto i te matahiti 1835; te vai ra e Pae chipa tuiroo, no te Ekalesia, tei ravehia i roto i taua matahiti ra, e teie hoi taua mau ohipa ra.

1.] I roto i taua matahiti ra, i te 14 no febuare, ua matihia e ua faataahia te Pūpū Hoē Ahuru ma Piti Aposetolo no teie anotau hopea nei. Mai te faatiaraahia o teie Pūpū matamua, no te anotau hopea nei, e 58 taata tei mau i taua toroa ra. E ere rā te reira i te pūpū Aposetolo matamua i faatiahia i nia i te fenua Amerika, no te mea i roto i te Buka a Moromona, 3 Nephi 16.4, ua faaitehia mai, ia tatou e, na te Fatu iho i faatia i te Pūpū Hoē Ahuru ma Piti Aposetolo i rotopu i te Ati Nephi, a parahi ai Oia i rotopu ia ratou i muri iho i to'na tia-faahou-raa.

2.] I te 28 no febuare 1835, ua faatiahia te Pūpū matamua no te Hitu Ahuru, oia hoi, te Nuu Orometua no te Ekalesia. Ua haamata ē hia na te ohipa poro haereraa Evanelia hou te faatiaraa o te Ekalesia. E tauturu teie Pūpū Hitu Ahuru no te mau Aposetolo i te a'oraa i te Evanelia e ua parauhia ratou e "Mau Taata Minute". Mai te mahana i faatiahia'i teie Pūpū matamua e tae roa mai i teie mau mahana, te vai ra e 249 Pūpū Hitu Ahuru tei faatiahia i roto i te Ekalesia.

3.] I te 3 no Tiurai i taua matahiti ra i roa'a'i, ia Iosepha Semita, te hoē parau tuatapapa tahito tei papaihia e Aberahama. Ua iriti oia i taua parau tuatapapa ra i roto i te reo baratane e te ite nei tatou i te reira ei Buka a Aberahama i papainia i roto i te Buka Poe Tao'a Rahi.

4.] Ua haputuputuhia te mau Heheuraa atoa ta te Pero-pheta ra o Iosepha Semita i farii, e i te 17 no Atete i te matahiti 1835, ua tuuhia te reira i mua i te aro o te mau melo atoa no te Ekalesia e ua fariihia, e ratou atoa, ei Buka mau na te Ekalesia. Mai te reira mahana mai â, ua amui atoa hia, i roto i taua buka ra, te mau Heheuraa apî i roaa mai, e ua parauhia taua buka ra te **Buka Fafau**.

5.] I roto i te matahiti 1835 i neneihia'i te **Buka Himene** matamua no te Ekalesia a IESU MESIA I TE FEIA MO'A I TE MAU MAHANA HOPEA NEI.

Mai te mahana i faatiahia'i teie na Pŭpŭ, ua rave itoitou ratou i te ohipa e ua ite tatou i te reira na roto i te tupuraa o te Ekalesia, no te mea, o te poro-haereraa i te Evanelia ta ratou ia ohipa. Ua riro atoa teie nau **Buka** ei tauturu rahi no teie na Pŭpŭ e no te mau taata atoa, i roto i te ohipa a te Atua.

Papaîhia e Ture O.ometua.

✧ TE AMUIRAA EPERERA. ✧

Mai te au i te parau i faaitiehia a'enei, i roto i te He-heuraa Apî, e faaterehia te Amuiraa Eperera, no te Ekalesia a Iasu Mesia i te reia Mo'a i te Mau mahana hopea nei i Papeete nei, e ua na reira mau hia i teie ava'e Eperera i mairi a'enei.

Na roto i taua faafaaraa ra ua tae mai te pŭpŭ Pû, te pŭpŭ Tu'e popo, te mau taata patia fâ e te tahi mau taeae e te mau tuahine no te Amaa no Takaroa, e na roto i to ratou taeraa mai, ua rahi te ohipa tei ravehia i roto i te Amuiraa.

Ua tae mai ratou i te 4 no Eperera, e i taua pô ra ua anihia, e te Tavana Rahi, ia haere te Pūpū Pū i nia i te mahora apī o te Hau ia faatai i te pehe faahanahanaraa i te Hau Farani, no te mea, i taua pô ra e tauruaraa ta te Hau i faatupu, e ua haere te Pūpū Pū i reira e ua mauuuru te Tavana Rahi e te mau taata atoa tei faaroo i ta ratou faatairaa.

I te 5 no Eperera ua haamatahia te Amuiraa na roto i te hoê Pureraa Autahu'araa, e i roto i taua pureraa ra e rave rahi te mau mana'o tei faaroohia e i reira i faataahia'i te mau ohipa atoa te ravehia i roto i te Amuiraa. I taua mahana ra ua faaroohia te mau parau tei hau i te maitai i roto i na pureraa tei faaterehia i te hara 10 i te avatea e i te hora 2 i te ahiahi, e i taua pô ra, ua haere te Pūpū Pū i nia i te mahora apī o te Hau e ua faatai ratou i te tahi mau pehe tei hau i te navenave. No te au o ta ratou faatairaa ua maere te mau taata tei faaroo ia ratou e ua popo ratou ei faaiteraa i to ratou mauuuru.

I te mahana maa, te 6 no Eperera, ua faaterehia te Pureraa Autahu'araa e te pureraa a'oraa Evanelia o tei riro ei faaanaunataeraa i te mau taata tei tae mai, e i te hora 3 i te ahiahi ua haere te Pūpū Tu'e popo i nia i te mahora i Faupua e ua tu'e ratou e te tahi pūpū no Papeete. I taua pô ra ua faaterehia te hoê haapiiraa hoho'a, na te Amaa no Papeete, e ua tauatini e tiahapa te taata tei tae mai.

I te mahana Sabati, te 7 no Eperera, ua faaterehia na Pureraa e toru e i roto i taua mau pureraa ua faatohia te tahi mau ohipa, oia hoi, te tahi mau faanuura toroa, faatoroaraa e te faataaraa i te tahi mau taeae e te tahi mau tuahine no te tahi mau ohipa. I te ahiahi faatere atura te Amaa no Takaroa i ta ratou haapiiraa hoho'a, e te faata'iraa pū, e ua tae mai fatata e maha tauatini taata no te mea ua parare te roo o te Pūpū Pū na roto i te oire, e i taua pô ra ua faaroo ratou i te pororaa Evanelia a te Ekalesia.

I te monire, te 8 no Eperera, ua haere te Pūpū Pū, e te

mau melo atoa no te Ekalesia, i Tautira e a haere ai ratou, ua faataihia te tahi mau pehe i te mau mataeinaa atoa, e i to .atou taeraa i reira ua ravehia te ohipa patia fâ, tu'e popo e te faata'iraa pû, e taoto atura ratou i reira i tana pô ra. I te poipoi raa a'e faarue atura ratou i Tautira, no te haere mai i Papeete, e i to ratou haereraa mai tapae atura ratou i Orofara e ua faatai ratou i te tahi mau pehe upaupa no te faa-oaoaraa i te mau taata i reira, e no te rahi o to ratou oaoa ua himene mai ratou i te tahi mau himene.

I te mahana toru, te 19 no Eperera, ua faatupu te Pere-titeni o Le Roy Mallory i te hoê amuraa maa, i te fare Oro-metua, na te Pūpū Pū no to'na mauruuru ia ratou.

O te huru teie o te mau ohipa i ravehia i te Amuiraa hopea nei, e na roto i te reira ua tae te Evanelia mau i mua i te aro o te mau taata e rave rahi e ua riro atoa te reira ei haa-piiraa ia ratou i te huru mau no te Ekalesia *Momoni*.

Teie te Amuiraa, uo te EKALIESIA A IESU MESIA I TE FEIA MO'A I TE MAU MAHANA HOPEA NEI, tei hau i te nehenehe i te mau Amuiraa atoa tei faaterehia i Tahiti nei.

Papaiahia e Marcel Bonnet.

TE MAU PARAU API

Ua Faahanahanahia.

I te ava'e no Mati i mairi a'enei ua faahanahanahia na taeae no te Ekalesia, o Iosepha F. SEMITA no te Pūpū Ahuru ma piti Aposetolo e o Dr. F. S. HARRIS te Peretiteni no te Brigham Young University, na roto i to raua maitiraahia ei melo no te Sotaiete te VICTORIA Institute, no Baratane.

Ua faatiahia teie Sotaiete, i te fenua Baratane, i te matahiti 1865 no te imiraa i te mau parau no nia i te philosophia e te parau a te Atua: ia

imi i te mau ravea atoa, na roto i te haehaa, ia faaore i te faaroo ore i te Atua, te tumu o te mau mea atoa.

Te faaite atoa hia maira e, e mea iti roa te melo no taua Sotaiete e e piti a'enei taeae no te Ekalesia tei riro ei melo no taua Sotaiete, oia hoi, o J. E. TAMATI e o Ioane A. WIDTSOE.

E Hiona Uteute.

I te ava'e no Mati i mairi a'enei ua tupu te hoê mea maere i te fenua Turetia, oia hoi, ua mairi mai te hiona, e ere ra i te hiona uouo, e hiona uteute, e te iteraa te mau taata i taua huru ra, ua maere e ua mata'u hoi ratou, no te mea e tapao ati te reira ia ratou.

Ua Penihia E Ua Fatata Roa I Te Pohe.

I to raua hauti noaraa, ua parai te tamaiti ra o Robert GRAY, e 2 matahiti e te afa, i to'na teina iti o Jackie, 17 ava'e, i te peni ereere no te pereoo uira. Na roto i taua ohipa ra ua fatata roa tera tamaiti i te pohe, e ua rave te mau taote ia'na i na hora e piti i ora mai ai oia ra.

Ua Teitei Rii Te Ou'araa.

I te mahana 1 no Eperera i mairi a'enei, ua haere te hoê vahine Rutia o Vera FEDOROVA, na nia i te pahi reva tei faaterehia e te tahi ibo taata, e i to'na taeraa i te teitei ra e 6.350 metera, oia hoi e 20.853 avae, ua ou'a mai oia i rapae i te pahi reva no te haereraamai i raro.

Ua faaite taua vahine ra ua vai noa oia, i roto i te reva, e 22 minuti mai te taime oia i faarue ai i te pahi reva e to'na taahi faahouraa i nia i te fenua. Tei ia'na te rê, no te mau vahine, no te ou'araa na te vahi teitei.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.